

【無間地獄】

（科註第四七三頁第八行）

《三藏法數》：謂有罪眾生，至彼受苦，無有間歇，故名無間。此於八熱中又為最重之獄也。成實論明五種無間：

- 一者，趣果無間。謂有極重罪者，即向彼獄受其果報，無有間歇。
- 二者，受苦無間，謂至彼獄受諸痛苦，無有間歇。
- 三者，時無間。謂至彼獄受苦，時節無有間歇。
- 四者，命無間。謂彼地獄，壽命一中劫，無有間歇。
- 五者，形無間。謂彼地獄受罪眾生，生而復死，死已還生，身形無有間歇也。（一中劫者，二十小劫為一中劫也。）